



U nastavku suđenja za zločin počinjen u Gornjoj Bioči (općina Ilijaš), svjedok Tužilaštva BiH je ustvrdio da su optuženi Srpko Pustivuk i izvjesni Neđo Ikonić bili "pitani za sve". Svjedok Izet Hujčić je kazao da niko drugi u selu Gornja Bioča "nije komandovao" izuzev Srpka Pustivuka i Neđe Ikonića.

"Njih dvojica su bili glavni u Gornjoj Bioči. Oni su bili specijalci, njih smo najčešće viđali i bili su pitani za sve", rekao je Hujčić.

Tužilaštvo BiH tereti Pustivuka da je kao milicioner-specijalista u Stanici javne bezbjednosti (SJB) u Ilijašu učestvovao u hapšenju i zarobljavanju civila bošnjačke nacionalnosti, koji su potom odvođeni u druge logore i objekte za zatočenje.

Pustivuk je, prema optužnici, tokom maja i juna 1992. godine u selu Gornja Bioča, zajedno s drugim pripadnicima vojske i policije Srpske Republike BiH, učestvovao u napadu na civile, te je tom prilikom ubijen jedan, a tri su teško ranjena.

Hujčić je ispričao da su Srbi i Bošnjaci iz Gornje Bioče živjeli u veoma dobrim odnosima sve do kraja maja 1992. godine, kada je većina muslimana zatočena u osnovnoj školi, među kojima je bio i on.

Svjedok tvrdi da je tokom zatočenja u školi u Bioči saznao da su ubijeni Uzeir Selimović i njegov stariji sin.

"Bio sam prisutan kada je Uzeirov mlađi sin pokazivao na Srpka i govorio da mu je on ubio oca. Za ubistvo starijeg brata nisam čuo šta je pričao", kazao je Hujčić.

Esad Šehić, drugi svjedok Tužilaštva, koji je također bio zatočen u školi u Bioči, rekao je da su stražu držale komšije srpske nacionalnosti.

"Mi koji smo bili zatočeni mogli smo se kretati u krugu škole, te uz dozvolu stražara odlaziti po hranu i na kupanje. Naravno, morali smo se brzo vraćati natrag. Spavali smo na klupama. Žene i djeca su bili smješteni u obližnjoj kući i pripremali su hranu za nas", prisjetio se Šehić.

Tokom unakrsnog ispitivanja, oba svjedoka su rekla da tokom petodnevnog boravka u školi nisu bili maltretirani.

Hujčić i Šehić su ispričali da su iz škole u Bioči prebačeni autobusima i kamionima u "Iskrin"

magacin u Podlugovima (općina Ilijaš), te u “Planjinu kuću” u Semizovcu, gdje su “uslovi boravka bili mnogo teži, a maltretiranja česta”.

Nastavak suđenja zakazan je za 17. maj ove godine.

*[\\*Preuzeto sa: http://www.ilijas.ba](http://www.ilijas.ba)*